

**Iluliortiternernut aningaasalersuineq pillugu Inatsisartut peqqussutissaattut
siunnersuut**

pillugu

Inatsisartut Attaveqaqatigiinnermut Ineqarnermullu Ataatsimiititaliaata

ISUMALIUTISSIISSUTAA

siunnersuutip aappassaaneerneqarnerani saqqummiunneqartoq

Inatsisartut Attaveqaqatigiinnermut Ineqarnermullu Ataatsimiititaliaat
suliarinninnermini ukuninnga inuttaqarpoq:

Inatsisartunut ilaasortaq Godmand Rasmussen, Atassut, siulittaasoq
Inatsisartunut ilaasortaq Olga P. Berthelsen, Inuit Ataqtigiit, siulittaasup tullia
Inatsisartunut ilaasortaq Palle Christiansen, Demokraatit
Inatsisartunut ilaasortaq Agnethe Davidsen, Siumut
Inatsisartunut ilaasortaq Jurgen Wever Johansen, Siumut

Peqqussutissatut siunnersuutip siullermeerneqarnerani siunnersuummi
siunertarineqartut Inatsisartuni partiit akornanni nalinginnaasumik
tapersorsorneqarnerat Inatsisartut Attaveqaqatigiinnermut Ineqarnermullu
Ataatsimiititaliaata maluginiarpaa.

Siunnersuutip tusarniaassutiginera

Peqqussutissatut siunnersuut A/S Inissiaatileqatigiiffik INI-mut, KANUKOKA-mut,
Iserit A/S-imut, Aningaasaqarnermut Pisortaqarfimmut, SIK-mut, Sulisitsisunut,
Ilik-mut, Nusukamut, PPK-mut, PIP-mut, AK-mut, IMAK-imut, ASG-mut,
Grønlandsbankenimut, Sparbank Vestimut, Ejendomskontoret Igdlomut kiisalu
Grønlands Ejendomskontorimut tusarniaassutigineqarpoq.

Tusarniaanermut akissutit kattuffinnit suliffeqarfinnillu ukuninnga tiguneqarsimasut
ataatsimiititaliap maluginiarpaa: A/S Aningaasaqarnermut Pisortaqarfik INI,
KANUKOKA, Aningaasaqarnermut Pisortaqarfik, SIK, Sulisitsisut, Ilik, Nusuka,
PPK, AK, IMAK Grønlandsbankilu. Tusarniaanermut akissutitut tiguneqartut
nalinginnaasumik nassuiaatini erseqqinnerusumik taasamik ilanngunneqarlutillu
oqaaseqarfigineqarsimanerat ataatsimiititaliap pitsaasutut isigaa.

Siunnersuutip imarisai

Innuttaasut amerlanerusut inissiamik imminut pilersorsinnaanissamut periarfissinneqarnissaannik Naalakkersuisut Inatsisartullu naalakkersuinikkut kissaatigisaannut anguniagaannullu siunnersuut matumani pineqartoq naapertuuppoq. Inissianik aningaasalersuisarneq pillugu Inatsisartut peqqussutaat maanna atuuttoq nr. 4, 30. oktober 1998-imeersoq siunnersuutitut saqqummiunneqartup taarsissavaa. Aalajangersakkat inissiamik aningaasalersuinissami innuttaasut taarsigassarsinnaanermut periarfissaannut tunngasut peqqussutissatut missingiummi Naalakkersuisut erseqqissarniarsimavaat. Taamaallilluni tamanna inatsisip oqaasertaani peqqussutissatullu siunnersuummut nassuiaatini erseqqissumik takuneqarsinnaalerluni.

Inissiat mikinerusut peqqussutissatut siunnersuummi immikkut isiginiarneqarnerat

105 kvadratmeterisut angissusilinnik nutaanik inissialiornissaq peqqussummi maanna atuuttumi annertuumik kaammattuutigineqartutut oqaatigineqarsinnaagaluartoq inissiat mikinerusut aningaasalersorlugillu sananissaasa pilerinarsinnaanerat peqqussutissatut siunnersuummi ammaanekarpoq. Tamanna kvadratmeterinik siullernik 65-inik sananermi taarsigassarsiarisinnaasat qaffasinnerutinnerisigut inissiallu angineruleriartornerani taarsigassarsiat appariartuaartinnerisigut Naalakkersuisut siuarsaaviginiarpaat. Tapiiffigineqarsinnaatitaasulli annertunerpaaffiatut killigitinneqartoq 105 kvadratmeterimit 110 kvadratmeterimut qaffanneqassaaq.

Innuttaasut namminneq aningaasaleeqataassutissaat annertusissanngilaq

10-40-50 malillugu aningaasalersueriaatsip attatiinnarneqarnissaa Naalakkersuisut peqqussutissatut siunnersuummi aalajangiusimavaat. Taamaallilluni innuttaasut namminneq aningaasaleeqataassutissaat qaffanneqanngilaq. Namminersorerullutik Oqartussanit kommuninillu taarsigassarsiarisinnaasat annertunerpaaffiat peqqussummut atuuttumut sanilliullugu allanngorani aalajangiusimaneqaannarpoq. Aaqqissuussinissatulli siunnersuutigineqartumi nutaamik illuliornermi kvadratmeterinik siullernik 65-inik sananermi taarsigassarsisut annertunerusumik "akikillisaaviigineqassapput". Inissianik niuernermi inissiat mikinerit piumanearnerisa annertunerulernissaanut periuseq taanna Naalakkersuisut pitsaasutut isigaat.

Taarsigassarsisut namminneq suliaqarnerisa naleqassusia peqqussummi ilaatinneqanngilaq

Taarsigassarsiallit illuutiminnik pitsanngorsaallutillu allilerisimasinnaanerat illumik sananermi tamakkiisumik aningaasartuutit naatsorsornerini ilaatinneqanngillat. Tamatumani aallaaviuvoq taarsigassarsiallip pitsanngorsaataasa sanaap tungaanit isigalugit illersorneqarsinnaassuseqarnerannik naliliinissaq annertuumik ajornakusooruteqarsinnaammat. Taamaattumik taarsigassarsitinneqarnissamik qinnuteqaammut sanilliullugu taarsigassarsiallit namminneq pitsanngorsaataat qanoq naleqartiginersut nalileruminaapput.

Piginnittut nikinneranni taarsigassarsiarititat akiligassanngortinneqassanngillat

Peqqussutip atuuttup akerlianik taarsigassarsiarititat pisortanit aningaasalerneqarsimasut piginnittut nikinneranni akiligassanngortinneqassanngillat. Allannguut taanna piginnittut nikinnerini tamani atuuppoq.

Ataatsimiititaliap siunnersuummik suliarinninnera

Inissianut tunngatillugu anguniakkat siunnersuummut tunuliaqutaasut ataatsimiititaliamit ataatsimut isigalugu tapersersorneqarput. Peqqussutissatut siunnersuut iliuusissanik pitsaasunik isumatuunillu amerlasuunik imaqartoq ataatsimiititaliaq isumaqarpoq. Peqqussutissatut siunnersuut manna aqutigalugu Innuttaasut amerlanerusut ukiumi aggersuni inissianik imminut pilersornissamut periarfissaannik ammaassineq ataatsimiititaliap ataatsimut isigalugu tapersersorpa.

Inissiat aserfallassimasut nutarsarneqarsinnaaqqullugit aserfallatsaaliorneqarsinnaaqqullugillu inissianik ukiut 20-it sinnerlugit pisoqaassusilinnik iluarsaanissamut tapiissuteqarsinnaanermik peqqussutissatut siunnersuummi periarfissiisoqarnera ataatsimiititaliami amerlanerussuteqartut Siumumeersut, Inuit Ataqtigiiinneersut Atassummeersullu tamakkiisumik taperserpaat. Inissiat mikinerusut peqqussutissatut siunnersuummi immikkut isiginiarneqarneranut tunngatillugu, Inuit Ataqtigiiinniit kissaatigineqarpoq, inissiat 65 m²-t annertunerusumik tapiiffigineqartalernerisa kingunerisinnaagaa, inissianik mikisunik sanaartornerup akitsoriarnera. Tamanna pinaveersaartinneqartariaqarpoq, Naalakkersuisullu tassuuna malinnaaqqissaartariaqarput.

Ataatsimiititaliami ikinnerussuteqartup Demokraatit ilaasortaataata aalajangersagaq taanna naapertuutinnngitsutut isigaa, tassa inissiap qanoq annertutigisumik aserfallatsaaliqarsimassusia aallaavigineqartariaqarmat.

Illoqarfinni inissiat sanaartukkat mikinerusut akikinnerusullu amerlanerulernissaannik Naalakkersuisut anguniagaat ataatsimiititaliap ataatsimut tapersersorpa. Tassami inissiani 105 kvadratmeterisut angissuseqartuni tapiissuteqarsinnaanermut periarfissat tamakkiisumik atorluarneqareersorinarmata.

Ataatsimiititaliap inassuteqaatai

Ataatsimiititaliami amerlanerussuteqartut Siumumeersut, Inuit Ataqtigiiinneersut Atassummeersullu siunnersuut iluserisamisut iluseqartoq akuersissutigineqassasoq inassutigaa. Nunatsinni inuit amerlanerusut namminneq pigisaminnik inissiaqalernissamut periarfissaat peqqussutissatut siunnersuutikkut siuarsarneqartut ataatsimiititaliami amerlanerussuteqartut isumaqarput. Aningaasaleeriaatsit atorneqartut ingerlaavartumik nalilersorneqarlutillu misissuiffigeqqissaarneqartarnissaat pingaaruteqarpoq.

Peqqussutip aningaasaqarnikkut sunniutai ingerlaavartumik nalilersorneqartassasut ataatsimiititaliami amerlanerussuteqartut Naalakkersuisunut kaammattuutigissavaat. Kiisalu taarsigassarsinissamik sulianik allaffissornikkut pisariaqartumik suliarinninnermi, pisortat tassunga atatillugu aningaasartuutigisaannut naapertuuttumik, Naalakkersuisut kommunalbestyrelsillu peqqussut aallaavigalugu

akiliuteqartitsinissamut tunngavissinneqarnerat ataatsimiititaliami amerlanerussuteqartut aamma taperserpaat.

Ataatsimiititaliami ikinnerussuteqartup Demokraatit ilaasortaataata ataani allassimasunik oqaaseqaateqarluni siunnersuutip akuersissutigineqarnissaa inassutigaa. Peqqussutissatut siunnersuut iliuusissanik pitsaasunik isumatuunillu amerlasuunik imaqartoq ikinnerussuteqartoq isumaqarpoq. Inissiarli nutarternissamut allilerneqarnissamulluunniit akuerineqassaguni ukiunik 20-nik pisoqaassuseqarlunilu 95 kvadratmeterinit mikinerunissaanik aalajangersagaq peqqussutissatut siunnersuummit peerneqartariaqartut ikinnerussuteqartoq isumaqarpoq. Aalajangersakkat naammaginarsorinangillat, ikinnerussuteqartummi naliliinera malillugu suliat ataasiakkaat aallaavigineqartariaqarmata. Taamatuttaaq §§ 18-ip 19-illu peqqussutissatut siunnersuummit peerneqarnissaat ikinnerussuteqartup kissaatigaa, taamaaliornikkut taarsigassarsinissamik suliat pisortanit suliarineqarnerannut atatillugu akiliuteqartitsisinnaanermut piginnaatitsissut peerneqarsinnaaqqullugu.

Allannguutissatut siunnersuummik taakkununnga naapertuuttumik peqqussutissatut siunnersuutip aappassaaneerneqarnissaanut saqqummiusseqqullugit Naalackersuisunut ikinnerussuteqartumit **kaammattorneqarput**.

Taama oqaaseqaateqarluni Inatsisartut Attaveqaqatigiinnermut Ineqarnermullu Ataatsimiititaliaata siunnersuut aappassaaniigassanngortippaa.

Godmand Rasmussen
Siulittaasoq

Olga P. Berthelsen
Siulittaasup tullia

Agnethe Davidsen

Palle Christiansen

Jürgen Weyer Johansen